

四庫全書

集部

欽定四庫全書

儼山集卷五十五

明 陸深 撰

記四

嘉興新建察院記

我朝御史列居兩京皆謂之十三道各統以都察院道  
視十三省南北盡同而同以浙江為之首其制然也御  
史凡奉命而出所至則謂之察院匪若六曹諸司各以

本曹繫其體然也是故御史職在肅僚貞度察院得專  
達上下維地維人固兩重哉嘉靖五年中秋日嘉興府  
新作察院成嚴整壯麗甲於兩浙嘉興浙首郡也凡御  
史至入境按治與御史按竟受代去必於是洛陽潘公  
倣適以浙江道御史按浙庶政維新乃以嘉興守蕭侯  
世賢為才蕭侯謀諸二守王君大化將改作察院以繫  
體制爰瞻城中得廢寺一區相與規畫以授諸匠氏會  
公代去御史朔州盧公問之寔來睇視規材因以議於

分守參政胡公誨之胡公曰宜為計永永於時參政朱公  
應周僉事喻公宗之蔡公汝建史公文材先後行部至  
胥相之垂成會盧公以憂去既乃訖工蕭侯以書告于上  
海陸深曰願有記深不文竊聞之先王之範政凡以待  
人也君子之寶位凡以行道也器者道之所寓無弊無  
復無振無起此位置本末之論天地之化所以常新蓋  
不獨一察院然也法以人行人以地重御史之所為重  
凡以行法也察院之所為急凡以奉御史也廉遠堂高

羊存禮在此名實精粗之論天下之紀賴以不墜蓋不獨嘉興一察院然也顧天下之政有體有制出於一人符之百世成於一方則於四海是文武周公之意以待後之人明於此者謂之知辨於此者謂之禮舉此而集者謂之才若兩御史之賢二郡侯之績於茲察院也皆不可以不記是役也費出於羨耗工成於顧募役徵於優隙以金計者六百有四十五兩有奇以日計者三百有三十以工計者九千有四百有九十為堂五間崇二

十四尺贏廣七筵深五之三翼堂而左右之者為室各  
二堂之前為露臺覆露臺者為軒棚為房以處案吏者  
列之東西各五間候隸房亦如之引堂而後者為穿堂  
五間後堂亦如之間為卧闥者二為烏臺三間臺之崇  
四尺為書房十間居廳堂東西之際為生吏房三間門  
有儀墀有級庖有所滂有床浴有室溷有舍書房之東  
西偏各有隙地西為圃可射東為亭可憩亭之南為池  
可臨總之為地十有八畝南北四十有八丈東西三十

有三丈總之為屋八十有三間經始於四年十月之望  
佐之通判李君源與董君琦張君珮推官南全而王君  
大化實始終之邑令之與有事者嘉興則龍君欽秀水  
則趙君章桐鄉則董君鉉海鹽則劉君桂平湖則鄭君  
瑚崇德則葉君瑞嘉善則李君調元有勞其間者則典  
史李玉梁珍也

江風遺憾記

江風遺憾終慕也終慕為誰歎之吳生鰲也生之言曰

鰲早孤生才六月耳無所知知乳哺又漸知視息僅僅  
識母襁褓不能離又漸識母顏能辨母聲時時見慈節  
孺人出之懷中撫頭而歎淚續續霑臆揮灑嗚咽罷又  
或呼天長吁即摩挲號曰未亡人洪故家官族也固能  
死所不死者恐吳氏鬼不食耳言已復泣泣不復已鰲  
當其時漫不省是何等言是何等狀也孺人勤紡績以  
育鰲又漸教鰲以詩書鰲奉孺人惟謹鰲漸欲覓父所  
在見時隣舍家悉事游賈或經歲還或經數歲未還意



久亦還耳亦不敢問又漸聞父客死他鄉不復還意惘  
恍叵測慈節始告之曰兒咥兒父果沉溺死死時余年  
二十今日久矣初商游於越歸自荻港人馬同舟中流  
遇風與俱覆矣鰲聞之號慟幾絕遂復修先業事遠遊  
將以訪鴟夷之遺蹤哀瑩篔之餘韻每涉江水颺天風  
輒躡踊涕泗終日士大夫憐之為題江風遺憾或賦詩  
以弔鰲以慈節顏堂以為鰲母慰友人汪子哀其言致  
之陸深予感之為書其事曰生死天命也禍福人事也

修事以俟命幸不幸存焉處死有道蹈禍有數不幸猶  
幸也獨其周旋於禍福生死之際依倚於義理慈孝  
之天者君子謂之世則聖君賢相將必求其人以揚礪  
引長之謂之世風風噫氣也鼓盪萬物以振迅八表莫  
速焉貞哉洪孝哉鰲是可表世風乎鰲之父諱賜字思  
寵

重修松江府學記

正德己巳江南大水而松特甚越明年庚午水再至浸

公私廬舍凡旬有五日而退退而學宮壞特甚又明年辛未夏內江喻侯時以才御史來守松至既禮瞻大懼弗稱乃進師弟子而問故已又進父老於庭問疾苦外使之言其故皆前對曰自昔弦誦有堂有隍厥惟天災以渝舊觀侯歎曰是在我凡起天下於弊者乘其未極則費寡而功多若是者失今不為他日民有千百其勞者矣松民甚憊而又遺之後艱謂何是誠在我當是時府庫無羨財侯乃撙節浮費殫竭心力至冬而後始事

而令于教授彭鍊曰教授職務稀宜試督於是且爾也能廉遂以規約相予予觀厥成焉鍊曰諾即日鳩材募工因以役民之不能食者咸踴躍恐後由是易腐以堅益圮以阜整頽輝黯次第舉矣會樂安詹君崇以進士來推府事旦夕侯之勤勞也憮然曰獨太守責耶適被符攝令華亭維侯之命以身任之百費有加事乃告集寔甲戌歲之秋也凡歷四載自大成之殿明倫之堂殿之東西廡堂之左右四齋尊經之閣魁星之樓崇德養

賢之堂旁之鄉賢之祠講誦之號舍游息之亭館禮器  
雅樂之箴庖湍廨署之所後之鄉射之圃外之櫺星之  
門成德達材之坊登雲之橋皆還于舊維新有作者則  
仰高之坊以冠於文廟云偉哉皇乎教授君身親厥功  
以其始末走告于陸深又以其弟子員王輔而下凡三  
百人合詞曰是功鉅矣何可忘願昭示來裔深維皇朝  
建學徧寓內而輔理之才於是咸出松之人才嘗甲天  
下矣今天子右文求賢皇皇弗給維是棟宇之敝也不

患其無復也吾獨愛喻侯心之仁也以侯之知體也不  
患其無助也吾獨愛詹君義之勇也蓋自古豐功懋績  
必有偉才長識之士以為之於其豫周公之詩曰迨天  
之未陰雨徹彼桑土是已亦有同心一德之人以相先  
後不言而喻帝虞之典曰伯拜稽首讓于夔龍是已夫  
有周公之才為夔龍之讓則和德濟濟彛倫攸叙休徵  
臻而彛倫叙矣是故顏淵曾參之徒相與從孔子於困  
窮之中以刪次其說而傳固以望之天下後世也若茲

一役可謂備矣宜有記贊之成者同知侯君自明孫君  
璽通判聶君瓚錢君貫參之者華亭縣丞趙才也

羅氏義宅記

昔高平范文正公作義田以贍族世傳以為盛事今歙  
羅君作義宅蓋聞范公之風而興起者也予亦欲傳其  
事羅之肖者曰滋將廣其傳以告予久而未有以答也  
茲乃伐石請書其詞曰宅以義名合族也義取於辨何  
合之為夫物久必繁繁則必合合而無辨何以能久是

故合之所以成其辨也羅氏之宅凡七畝其居凡百有九十其族凡三十有六堂曰義堂圃曰義圃井曰義井其田百畝其租百石在羅定之里嗚呼羅君無范公之名位與爵祿而彷彿范公之舉措君真義士哉夫義利之判久矣羅世以貲高鄉里至東峯君益昌大東峯名元孫慷慨游江湖間所務者營什一以計贏縮若為利謀也而獨有志於作宅君真義士哉予惟世人愛身重自一軀外若靳靳然且以吾身而視吾之兄若弟未有



如吾身者也自兄弟以至於為從為再從未有視之如  
吾之兄若弟者也自再從以至於為總麻為袒免又未  
有視之如從若再從者也蓋其屬遠故其情踈遠則易  
忘踈則易離雖欲視之如吾身視之如吾之兄若弟視  
之如吾之從若再從不可得也雖然自吾觀之此吾之  
兄也此吾之弟也此吾之從此吾之再從此吾之總麻  
此吾之袒免也自吾之祖若考而視之皆其子也皆其  
孫也皆其子皆其孫則其所以衣之食之煦之育之姻

之嫁之安之養之以至於合而撫慰之者皆其心也吾  
祖若考之心將以衣之食之煦之育之姻之嫁之安之  
養之合而撫慰之而吾之族人或至於饑寒困苦離散  
而莫統吾未知吾祖若考之心宜何如也嗚呼此羅君  
之義宅世不可少世又可少傳也哉雖然羅君之族三  
十有六矣自三十有六而又廣之其族漸以滋其費漸  
以繁吾懼夫七畝之宅百畝之田未足繼羅君之志也  
為羅君之子孫又宜何如也重義輕利以毋墜是舉此

固世風之所關獨羅氏也哉千百世之下當與范公並傳無疑余故太史氏樂書其事故書

薜荔園記

深讀太傅王公志震澤稱兩洞庭之勝往歲舉進士與今侍讀徐先生子容為同年先生西洞庭人也太傅公之言曰西山之起甲科寔自子容始夫山水之勝洩之乎人高賢之以聲光垂世也建置經位心目之所及則山益高水益深景益清遠造化之巧所不能與者又託

之乎人若徐氏之於洞庭洞庭之有薜荔園是也園之  
廣凡數畝地產薜荔因以名園云園之景凡十有三曰  
思樂堂曰石假山曰荷池曰水鑑樓曰風竹軒曰蕉石  
亭曰觀耕臺曰薔薇洞曰栢屏曰留月峯曰通冷橋曰  
釣磯曰花源四時朝暮之變態無窮而高下離立足以  
當欣賞而遊高明可謂勝矣洞庭既勝而園又勝也使  
人樂焉若仙居世外煙霞之與徒而日月之為客也君  
子有當世之志者疑於習宴安而畧憂勤矣似乎有所

不暇侍讀之言曰薜荔之有作寔自先太史公始太史公謀以娛靜菴府君之老也而未成成之者縉也是故堂曰思樂先公府君木主在焉一石一峯先世之藏也至於一泉一池一卉一木之微亦皆先人之志也每一過焉陟降汎掃之餘恍乎聲容之在目縉也何敢以為樂願子為我記之以示後之人深道吳輒望湖山思一到焉以考信於太傅公製作之奇遂拜思樂堂下與先生講通家之禮往來通冷橋遍遊茲園以觀里仁之化

未償夙心焉其何辭之能為雖然深少側聞徐氏之世  
西山也種德修義自靜菴府君而上數十百年矣舍宏  
潤澤至於太史公有述焉延和當秀乃大發之乎侍讀  
先生才富而學精雅負世望為天子講讀之臣獻沃弘  
多聲光方起將踵太傅公後冰輝玉映於西山之間以  
為族望以為鄉榮固有大於茲園者而茲園之成也可  
以觀繼志之孝焉可以見後樂之仁焉可以見裁成之  
道焉可以見垂裕之謨焉合是數美不可以不記

靜虛亭記

昔孟子稱舜為天子被衽衣鼓琴二女果若固有之及孔子困窮身為匹夫與其徒弦誦以自樂至稱顏子則曰賢哉不改其樂顏子之所有簞食瓢飲之外無幾也夫窮達天下之分也達之至於天子窮則至於匹夫窮達之極也樂乎天子與樂乎匹夫無以異也何哉凡欲因於有者也妄成於動者也交於有而俱出役於動而莫止雖以天子之大通而累方將焉以匹夫之易以至

足也而競方生焉故曰惟虛也足以涵天下之變惟靜也足以宰天下之動自天子至於匹夫者境也外也有時而為天子有時而為匹夫而我未嘗與焉是故不以天子之樂加乎匹夫不以匹夫之樂易乎天子無我者也其知靜虛之道者與顏孟氏歿而聖人之澤微矣迺有虛極靜篤之說行焉彼豈無以異乎權數流蕩之為也而較較然滯於形器之小猶有我也故曰濟天下之務而不累靜之至也成天下之化而不居虛之至也是



是非非之辨也吾友顧君德彰學有本原超然獨會於事物之表作亭後圃名曰靜虛以求孔顏之樂遭時任用不鄙州郡之煩猥存乎我者無適而不豫也孟子嘗曰禹稷顏回同道又曰易地則皆然是致一之學也德彰請曰願書為記以張亭之牖下

儼山集卷五十五

欽定四庫全書

儼山集卷五十六

明 陸深 撰

記五

沐齋記

黃子汝新顧名思義顏其所居之齋曰沐以問於東海  
陸山人山人告之曰沐之義大矣哉按沐从水从木成  
文又曰以木受水為沐山林之間萬木叢萃焉浹旬告

早焦槁枯焚沛然雨之蔥蘢改色早夜滋露欣欣向新  
勾者伸萌者達有不容遏之勢至於榮華果實以顯設  
造化生生之妙迨夫水泉涸落然後歸根養困以逌維  
新之會夫人心猶木也顧可無義理之沐哉易曰日新  
之謂盛德屈木為槃準以規矩挹水貯之時其寒煖以  
湔澡人身之污垢一新舊染用享上帝成湯之銘曰苟  
日新日日新又日新夫利欲猶垢汙也顧可無沐浴之  
功哉彼異端者流窺見元化之秘妄意時日之間亦嘗

以卯酉為沐浴矣鑿泉堰苗將襲取助長冀新新焉是襲抑末矣非汝新之謂也夫水木曰沐以自新也木水曰沐以新人也敬立而義行體周而用具斯義也孔子之舊也汝新其究而一新之哉汝新之先人未軒先生嘗以是道佐皇明之中葉顯而未融遂啓莆陽文獻之傳過庭之餘厥有聞哉從子如英山人同年進士也交舊而情新茲歸莆儻以質焉汝新曰願為記

怡怡堂記

歛據江南上游山愈高地愈狹是故境愈勝居愈密而  
齒繁其人往往游寓而散處也夫境勝則難遷居密則  
易爭人散處則情常不聯其勢然也由其勢而忘其俗  
之厚薄者恒民也夫難遷之至也鄙吝生焉爭之易也  
仇讐樹焉情之不聯也途人至焉君子將思變而通之  
乎通之者豪傑也黃君緬字惟中世家於歛慨然念地  
之故既以千金拓其宇又以若干金作堂若干楹工訖  
進其二弟約經而詔之曰斯堂之成也豈曰予之侈乎

吾弟之相也抑亦先人之緒也昔之湫隘者今茲翼然  
其有立乎昔之櫛比者今茲廓然其有容乎昔之互出  
入者今茲驩然其有合乎桑梓森然其前後乎山林蔚  
然其環衛乎吾與若安焉息焉迎和導祥以引嗣續于  
百世也百世而下將復通之則斯堂也豈惟黃氏之堂  
哉抑亦歛之堂哉且不朽矣雖然非予之所敢必也二  
弟蹠而俯曰唯唯於是兄作於前弟奉而趨兄止於中  
弟列而侍寒燠以時風雨以除弦誦俎豆日相周旋於

堂隍之間蓋怡怡如也宗黨過而落焉共頽之曰怡怡之堂以成惟中載拜謝曰不敏敢辱教介予友人楊君伯立請記於予予交黃氏有日矣惟中懷清通之才篤厚彝倫崇尚文藝約字會中抱珪璋之器誦說載籍醞釀經綸經字守中勵高尚之操維持清門總統內範兄弟若此固足以望於歛矣而况於茲堂之作哉貽謀端本有出於風氣之外者豈豪傑士非耶予雖未獲登茲堂以覽觀山川之會合稽驗土木之精工考紀歲月之

早暮以激引聲光於永永予獨愛惟中出於風氣之外也一居室且然况有大於此者哉夫一家始於一人有夫婦而後有父子有父子而後有兄弟有兄弟而後有子孫子孫以至於百人千人萬人其始本一人也由一人以至於途之人此古人之所以難也夫婦父子者恩之屬也兄弟者禮之屬也恩屬則固禮屬則疎故兄弟者恩之漸殺而禮之本始也恩以附於禮者兄弟也孔氏之訓曰兄弟怡怡豈非以其難哉夫怡怡之謂也和



之至也和之至自兄弟始故曰致中和天地位焉萬物  
育焉況於茲堂哉予與會中有麗澤之雅會中方將以  
禮魁天下因取其義之合於禮者俾惟中歸而刻諸堂  
以為記

鴈山圖記

古稱山河兩戒南戒盡鴈蕩山云山高四十里頂上有  
湖方可十里鴈至棲之故曰鴈蕩袁采云鴈蕩山溫州  
樂清東北山之通名也去縣九十里而遙山蓋純石而

土山不與焉沈存中云諸峯峭峻險怪不類他山當是  
谷中為大水衝激土盡去而石獨立爾采復為圖序總  
之云東西四谷西外谷有寺四曰古塔靈雲寶冠石門  
其流水自大芙蓉港出纜嶼其路平夷西谷有寺七曰  
能仁羅漢飛泉普明天柱華嚴瑞鹿其水自峽流筋竹  
澗出清江皆峻嶺自石門來者曰東嶺自芙蓉來者曰  
丹芳嶺自筋竹來者曰飛泉嶺達于東谷曰馬鞍嶺東  
谷有寺四曰靈巖淨名靈峯真濟其水自峽流白溪溪

上有路通白溪驛東北有嶺曰謝公嶺達東外谷有寺  
曰石梁自石梁東北至雙峯以達黃巖左有谷曰南北  
閣南閣乃鴈蕩之北有崇德寺水自蕩頂分流焉鄭向  
文云古樹老藤蔽虧天日林顛葉隙時見異峯餘波洩注  
流為飛泉高自雲霓懸瀉數道鴈山之大畧如此其雜  
記一時之勝者石梁云月已沒白雲西來如流水風吹  
橡栗墮瓦上轉射巖下小屋從瓴中擊地上積葉鏗鏜  
宛轉殆非世間金石音靈峯洞云兩大石相倚如合掌至

掌中望見山巒中青天如懸一片冰靈巖云巨石孤立  
如人俯月出正懸東南角星象纍纍下垂四旁如游魚  
噉喙以身為浮游在灑氣上夜色如霜雪諸峯相向立  
儼然三四老翁衣冠而偶語能仁云鴈山西南一峯絕  
高下視衆山猶當是大父行舟行南海月餘常望見直  
西北有物如高髻亂髮纒一握大倚為指南西谷云出  
南戶望屋上山山圍屋如城府或纍纍然如蜂腰綴下  
而剝其中淫淫然如燕巢斜罨而部其戶顛者宥者仰

者歎者囁者訛者偃者喙者掉者俛而窺者騰而上者  
如人皆具耳目口鼻而無一相似又云從靈雲寺南入  
山時時過絕險挽牽懸藤偃木以過日正中僅到山顛  
望見永嘉城下大江如牽一線白李孝光云北從天台  
來入古東甌郡境上望見西南有山相向立如兩浮屠  
遊者咸曰此鴈山門戶也益深入其阻視羅漢洞東西  
天柱大龍湫猶人有眉目十八寺皆其肺腑也文人之  
所次第如此予聞之土人言秋遊鴈落有以哉南土溫

溽春氣氤氳故有毒螫至草木黃落毒去乃可入數百  
里山皆在目中無毫毛蔽遮嗟乎遊貴及時也哉予將問  
途馬有告余者曰鴈山循崖而南百里如畫自樂清道  
白河芳林逾窰嶼過長嶽原經古塔本覺寶冠石門諸  
寺出白溪驛謂之右路自黃巖由白若嶺入石梁過靈  
巖逾馬鞍至能仁出長嶽抵窰嶼謂之左路馬鞍嶺蓋  
其分界云東谷之峯五十有三西谷之峯四十有八謂  
之百一峯有泉五有巖二十九有石三十三而石行廊

為勝有潭七而沐浴為大池一澗一曰筋竹峽一曰經  
行門一即石門也有洞十二而道姑為古有溪四而四  
溪之水為會有嶺七而丹芳為峻凡四十九盤有障二  
而平霞為華有橋二有嶼二有閣二即南北也有菴三  
而八扇為八菴有亭四而看不足為奇堂一曰資深遊  
人之所有事也余性喜登臨中歲四方行萬里而勝處  
必往蓋嘗至天台云獨於鴈蕩有眷眷焉今老矣乃畫  
為圖聊以資臥遊之適爾因考論其槩為記近時陸文

量以藩參出遊具列形勢謂西湖諸峯為劣至登平霞  
則獨立四顧疑非人間世也潘三峯御史加品隲焉謂  
有勵拔有空洞有雄渾淵澄勵拔如介空洞如通雄渾  
淵澄如旁行不流各舉其人類之則又出丹青談笑外  
皆有關於茲山也因并記之

願豐樓記

歛據萬山之顛多舊家人務本而俗禮讓顧田狹而齒  
繁也力畊或不足族聚而重遷也密屋而難容故其地



多樓居嘉靖丁亥汪氏之新樓成軒爽堅緻為一方望  
蓋克尚之居也扁曰願豐而請記于余使再至會余有  
遠役也克尚送之重申其請余叩之曰今世故家舊族  
喬木日茂而手澤就澌矣其子孫之賢而力者往往以  
更新室堂為繼述之大蓋其意亦欲傳之子孫以為燕  
休生息之地耳至于支分派屬則門戶各有掌握雖一  
瓦寸椽之微必計爾我以為承傳之大雖至親有不相  
假借者蓋一室事爾意至狹也杜詩之所謂願豐憂國

者之事卿大夫職業也於子何居克尚之言曰綺田野  
人耳何敢與於國謀顧念穀粟桑麻生民之天也一遭  
歉儉則骨肉有不相保者矣奚暇禮讓之圖且身處瘠  
薄之地人力雖盡孰與天時衣食既克仁讓可廣是故  
恒願時和年豐如唐虞之世綺得為堯舜之民而茲樓  
庶可保之子孫矣予聞之曰是安得有道者之言哉夫  
天人一氣耳志之所之氣必隨之願望所及天亦應焉  
至其效之淺深遲速係其誠否何如耳是以咨嗟嘆悼

之聲或召水旱災戾之變而和平恬淡天日之所為清明也此中庸之義而儒者之極功克尚其有聞於斯哉一樓居而公心昭焉誠意萃焉仁澤寓焉將所謂庶幾者非耶雖然稼穡王政也變理相業也家國人道也兼之者身也盡之者分也通之者一也克尚亦何負于卿大夫哉因書為樓記

燕翼堂記

詩之雅曰貽厥孫謀以燕翼子蓋言圖遠也凡遠之圖

則近者始有所藉若乃圖近於近則尤近者或有所遺  
而況於其遠者乎此古文武周公之志也夫文武周公  
聖人之備者也其所圖維經畫匪徒用以造周而已實  
以教萬世於無窮爾萬世而下有能師文武周公之志  
而用之乎師文武周公之志而用之則利用安身動罔  
不吉而況於其細者乎予故有愛於黃氏之堂也歛黃  
氏之裔曰文晟父一旦顧謂其子壽貴積輩曰吾黃氏  
自芮公避地於潭渡八百餘年矣先世思誠之堂燬吾

力復之今吾復抱孫矣合族之會不已難乎於是壽等咸曰諾乃擇地於思誠之東復作一堂既成而軒豁美麗據山水之勝扁曰燕翼父父子子祖祖孫孫世相踵武於其上蓋秩如也積來徵記記曰君子之居室也非徒以光門庭侈輪奐而已也蓋亦有義存焉是故先人貽之于我承之是之謂傳世自我作之後人受之是之謂永世傳世之謂孝永世之謂仁斯義也在身成身在家成家在國成國神而明之無鉅細無精粗其究一也

昔周之興也卜世三十卜年八百既其終也咸過其歷  
雖曰天命亦由文武周公相與經畫而圖維者以深長  
之思為久大之計若詩之所詠者而黃氏之堂義有取  
焉斯亦文武周公之徒非與則潭渡者固黃氏之豐鎬  
而茲堂將不為魯之靈光也哉雖然詩之頌曰君子有  
穀貽孫子蓋言祖宗之所以裕其後者非徒以基業為  
也抑亦有善道焉夫善莫善於仁黃氏復以仁孝與斯  
堂並傳焉則傳潭渡之族之盛豈可以世計哉於是積

再拜曰此家君之志也遂書為記



儼山集卷五十六

欽定四庫全書

集部  
儼山集卷五十七  
九至

詳校官庶吉士<sub>臣</sub>李如筠

中書<sub>臣</sub>劉源溥覆勘

總校官庶吉士<sub>臣</sub>何思鈞

校對官助教<sub>臣</sub>卜惟吉

謄錄舉人<sub>臣</sub>蔣雲師



欽定四庫全書

儼山集卷五十七

明 陸深 撰

史記一

周太記

周后稷名棄帝嚳子也其母有邠氏女曰姜原為帝元妃姜原出見巨人跡履之而有娠居期生子以為不祥而棄之隘巷牛羊皆舐字之又棄之林中會山林人多

遷之棄之冰上飛鳥覆翼之姜原以為神乃收養之因  
名曰棄棄為兒時屹如巨人之志其遊戲好種樹麻菽  
麻菽美及為成人遂好耕農相地之宜稼穡焉民皆則  
之堯聞而舉為農師有功帝舜曰黎民阻饑爾稷播時  
百穀封于郟號曰后稷別姓姬氏后稷之興在陶唐虞  
夏之際皆有令德后稷死子不窟立不窟末夏后氏衰  
廢稷不務不窟以失其官而犇戎狄之間不窟卒子鞠  
立鞠卒子公劉立公劉雖在戎狄之間復修后稷之業

百姓歸焉周道之興自此故詩人歌之公劉卒子慶節  
立國於豳慶節卒子皇僕立皇僕卒子差弗立差弗卒  
子毀隄立毀隄卒子公非立公非卒子高圉立高圉卒  
子亞圉立亞圉卒子公叔祖類立公叔祖類卒子古公  
亶父立古公亶父復修后稷公劉之業國人戴之薰育  
攻之民怒皆欲戰古公曰予不忍為乃去豳踰梁山止  
於岐山之下豳人盡復歸於岐下及他旁國亦多歸之  
於是古公乃營築城郭而邑焉作五官有司民皆頌之

古公有子長曰太伯次曰虞仲太姜生少子季歷季歷娶太任皆賢生昌有聖瑞古公曰我世當興其在昌乎太伯虞仲乃如荊蠻以讓古公卒季歷立是為公季公季修古公遺道諸侯順之公季卒子昌立是為西伯西伯遵后稷公劉之業則古公公季之法禮賢下士士多歸之伯夷叔齊聞西伯善養老自孤竹往歸之太顛閔夭散宜生鬻子辛甲大夫之徒皆往歸之崇侯虎譖西伯於紂紂乃囚西伯於羑里閔夭之徒患之乃求美女

奇物獻紂紂乃赦西伯賜之弓矢斧鉞使得征伐曰譖  
西伯者崇侯虎也西伯乃獻洛西之地請去炮烙之刑  
紂許之西伯行善諸侯皆來決平於是虞芮之人如周  
俱讓而去明年伐犬戎明年伐密須明年敗耆國明年  
伐邠明年伐崇侯虎而作豐邑自岐而徙都豐明年西  
伯崩謚為文王文王因羨里演易之八卦為六十四卦  
蓋即位五十年詩人道西伯受命之年稱王而斷虞芮  
之訟云太子發立是為武王武王改法度制正朔矣追

尊古公為太王公季為王季蓋王瑞自太王興武王即位太公望為師周公旦為輔召公畢公之徒左右王師修文王緒業九年武王上祭于畢東觀兵至于孟津為文王木主載以伐紂畢立賞罰遂興師武王渡河中流白魚入舟既渡有火下于黃屋流為烏其色赤其聲魄云諸侯不期而會者八百皆曰紂可伐矣武王曰未可也乃還師歸二年紂昏亂滋甚殺王子比干囚箕子太師疵少師彊抱樂器犇周於是武王徧告諸侯曰不可

以不畢伐乃率戎車三百乘虎賁三千人甲士四萬五千人以東十一年十二月戊子師畢渡諸侯咸會乃作太誓二月甲子昧爽至于牧野乃誓武王左杖黃鉞右秉白旄誓曰予發維共行天之罰今日之事不過六步七步乃止齊焉夫子勉哉不過四伐五伐六伐七伐乃止齊焉勉哉夫子爾所不勉有戮事已諸侯會者車四千乘陳師牧野紂亦發兵七十萬人距武王師尚父致師以大卒馳紂師皆倒兵武王馳之皆崩畔紂紂走反

入登于鹿臺之上蒙衣其珠玉自燔而死武王持太白旗以麾諸侯諸侯畢拜武王乃揖諸侯諸侯畢從武王至商商國百姓咸待於郊於是武王使羣臣告語商百姓曰上天降休商人皆稽首再拜武王亦答拜遂入至紂死所武王自射之三發而後下車以輕劍擊之紂之嬖二女皆經自殺武王又射三發擊以玄鉞已乃出復軍其明日除道修社及紂宮及期百夫荷罕旗以先驅武王弟叔振鐸奉陳常車周公旦把大鉞畢公



把小鉞以夾武王散宜生太顛闕夭皆執劍以衛武王  
既入立于社南大卒之左右畢從毛叔鄭奉明水衛康  
侯封布茲召公奭贊采師尚父牽牲尹佚筴祝曰殷之  
季紂殄廢先王明德侮蔑神祇不祀昏暴商邑百姓其  
章顯聞于天皇上帝於是武王再拜稽首又曰膺更大  
命草殷受天明命武王又再拜稽首乃出封紂子祿父  
殷之餘民未集武王乃使弟管叔鮮蔡叔度相祿父治  
殷已而命名公釋箕子之囚命畢公釋百姓之囚表商

容之閭命南宮适散鹿臺之財發鉅橋之粟以振貧弱  
命南宮史佚展九鼎寶玉命閔天封比干之墓命宗祝  
享祠于軍乃罷兵西歸作武成封諸侯班賜宗彞分殷  
之器物武王追思先聖乃褒封神農之後於焦黃帝之  
後於祝帝堯之後於薊帝舜之後於陳大禹之後於杞  
於是封功臣而師尚父為首封尚父於營丘曰齊封弟  
周公旦於曲阜曰魯封召公奭於燕封弟叔鮮於管弟  
叔度於蔡餘各以次受封武王徵九牧之君登豳之阜

以望商邑武王至周夜不寐周公旦曰曷為不寐王曰  
告女我未定天保何暇寐我南望三塗北望嶽鄙顧詹有  
河粵詹雒伊毋遠天室營周居于雒邑而後去縱馬華  
山之陽放牛桃林之野振兵釋旅示天下不復用也武  
王已克殷後二年問箕子以天道武王病羣公懼穆卜  
周公乃祓齋欲代武王武王有瘳後而崩太子誦代立  
是為成王成王少周公攝政管叔蔡叔疑與武庚作亂  
畔周周公誅武庚管叔放蔡叔以微子啓代殷後國於

宋收殷餘民以封衛康叔康叔武王少弟也晉唐叔得嘉穀獻之成王成王以歸周公于兵所周公受禾東土旅天子之命初管蔡畔周公討之三年而畢定故初作大誥次作微子之命次歸禾次嘉禾次康誥酒誥梓材其事在周公之篇周公行政七年反政成王北面就羣臣之位成王在豐使召公復營洛邑如武王之意周公復卜申視卒築居九鼎焉曰此天下之中道里均作召誥洛誥成王既遷殷民周公作多士無逸召公為保周

公為師東伐淮夷殘奄遷其君薄姑成王自奄歸在宗  
周作多方既紂殷命歸在豐作周官正禮樂制度於是  
民和睦頌聲興成王既伐東夷息慎來賀王賜榮伯作  
息慎之命成王懼太子釗之不任乃命名公畢公率諸  
侯以相太子而立之成王既崩二公率諸侯以太子釗  
見於先王廟申告以文武之所為王業之不易務在節  
儉毋多欲作顧命太子釗遂立是為康王康王即位徧  
告諸侯作康誥故成康之際天下安寧刑錯四十餘年

康王命作策畢公分居里成周郊作畢命康王崩子昭  
王瑕立時王道微闕昭王南巡狩不返卒於江上立昭  
王子滿是為穆王穆王即位春秋已五十矣王道衰微  
乃命伯冏申誡太僕作冏命穆王將征犬戎祭公謀父  
諫曰不可先王耀德不觀兵夫兵戢而時動動則威觀  
則玩玩則無震是故周文公之頌曰載戢干戈載櫜弓  
矢我求懿德肆于時夏允王保之先王之於民也茂正  
其德而厚其性阜其財求而利其器用明利害之鄉以

文修之使之務利而辟害懷德而畏威故能保世以滋  
大昔我先世后稷以服事虞夏及夏之衰也棄稷不務  
我先王不窳用失其官而自竄於戎狄之間不敢怠業  
時序其德遵修其緒修其訓典朝夕恪勤守以敦篤奉  
以忠信奕世載德不忝前人至于文王武王昭前之光  
明而加之以慈和事神保民無不欣喜商王帝辛大惡  
于民庶民不忍訢載武王以致戎于商牧是故先王非  
務武也勤恤民隱而除其害也夫先王之制邦內甸服

邦外侯服侯衛賓服夷蠻要服戎翟荒服甸服者祭侯  
服者祀賓服者享要服者貢荒服者王日祭月祀時享  
歲貢終王先王之順祀也有不祭則修意有不祀則修  
言有不享則修文有不貢則修名有不王則修德序成  
而有不至則修刑於是有刑不祭伐不祀征不享讓不  
貢告不王於是有刑罰之辟有攻伐之兵有征討之備  
有威讓之命有文告之辭布令陳辭而有不至則增修  
於德無勤民於遠是以近無不聽遠無不服今自大畢



伯士之終也犬戎氏以其職來王天子曰子必以不享征之且觀之兵無乃廢先王之訓而王幾頓乎吾聞犬戎樹敦率舊德而守終純固其有以禦我矣王不聽遂征之得四白狼四白鹿以歸自是荒服者不至諸侯有不睦者甫侯言於王作甫刑穆王立五十五年崩子共王繫扈立共王游於涇上密康公從有三女犇之其母曰必致之王女三為粲夫粲物之美也女何德以堪之小醜備物必亡康公不獻後一年共王滅密共王崩子懿

王薨立懿王之時王室遂衰詩人作刺懿王崩共王弟  
辟方立是為孝王孝王崩諸侯復立懿王太子燮是為  
夷王夷王崩子厲王胡立厲王即位三十年好利近榮  
夷公大夫芮良夫諫曰王室其將卑乎榮公好專利夫  
利百物之所生也而專之其害多矣以是教王其能久  
乎夫王人者將導利而布之上下者也王而專之其歸  
鮮矣厲王不聽卒以榮公為卿士王行暴虐侈傲國人  
謗召公諫曰民不堪命矣王怒得衛巫使監謗者告則

殺之諸侯不朝三十四年王益嚴道路以目厲王喜告  
召公曰吾能弭謗矣召公曰是障之也防民之口甚於  
防水水壅而潰傷人必多民亦如之王不聽於是國莫  
敢出言三年乃相與畔襲厲王厲王奔彘太子靜匿召  
公之家國人聞而圍之召公曰吾昔驟諫王王不從以  
及此難也今殺王太子其以我為讎而懟怒乎乃以其  
子代王太子太子竟得脫召公周公二相行政號曰共  
和共和十四年厲王死于彘太子靜長於召公家二相

乃共立之是為宣王宣王即位二相輔之修文武成康之遺風諸侯復宗周十二年魯武公來朝王籍千畝虢文公諫曰不可王弗聽三十九年戰于千畝敗績于姜氏之戎乃料民於太原仲山甫諫曰不可王不聽四十六年宣王崩子幽王宮涅立幽王二年西周三川皆震伯陽甫曰周將亡矣昔伊洛竭而夏亡河竭而商亡今周德若二代之季矣夫國必依山山川崩川竭亡國之徵也不過十年數之紀也是歲三川竭岐山崩三年幽

王嬖褒似周太史伯陽讀史記曰周亡矣昔自夏后氏  
之衰也有二神龍止於夏帝庭而言曰余褒之二君夏  
帝卜殺之與去之與止之莫吉卜請其釥而藏之乃吉  
於是布幣而策告之龍亡而釥在櫝而去之夏亡傳此  
器殷殷亡又傳此器周比三代莫敢發之至厲王之末  
發而觀之釥流于庭不可除厲王使婦人裸而譟之釥  
化為玄龜以入王後宮後宮之童妾既亂而遭之既笄  
而孕無夫而生子懼而棄之宣王之時童女謠曰糜弧

箕服實亡周國於是宣王聞之有夫婦賣是器者宣王使執而戮之逃於道而見鄉者後宮童妾所棄妖子出於路者聞其夜啼哀而收之夫婦遂亡奔於褒褒人有罪請入童妾所棄女子者於王以贖罪棄女子出於褒是為褒姒當幽王三年王之後宮見而愛之生子伯服初王娶申侯女為后而生太子宜臼至是竟廢申后并去太子而以褒姒為后伯服為太子太史伯陽曰禍成矣無可奈何褒姒不好笑王欲其笑萬方故不笑王為

烽燧約諸侯寇至則舉烽火乃舉烽火召諸侯諸侯悉至而無寇褒似大笑王說之為數舉烽火其後不信諸侯益亦不至幽王以魏石父為卿國人皆怨又廢后去太子申侯怒與繒西夷犬戎攻幽王幽王舉烽火徵兵兵莫至遂殺幽王驪山下虜褒似盡取周賂而去於是諸侯乃即申侯而共立故太子宜臼是為平王平王立東遷于錐邕辟戎寇也平王之時周室衰微齊楚秦晉始大政由方伯五十一年平王崩太子洩父蚤死立其

子林是為桓王桓王平王孫也桓王三年鄭莊公朝桓王不禮五年鄭怨與魯易許田許田天子之用事太山田也十三年伐鄭鄭射王傷二十三年桓王崩子莊王伉立莊王四年周公黑肩欲殺莊王而立王子克辛伯告王王殺周公王子克奔燕十五年莊王崩子釐王胡齊立釐王三年齊桓公始霸五年釐王崩子惠王閔立惠王二年大夫邊伯等五人作亂惠王奔溫居鄭之櫟王弟頹立為王初莊王嬖姬姚生子頹有寵及惠王即



位奪其大臣園以為囿故五人因以作亂四年鄭虢伐之殺王頹復入惠王惠王十年賜齊桓公為伯二十五年惠王崩子襄王鄭立後母曰惠后生叔帶有寵於惠王襄王畏之三年叔帶與戎翟謀伐襄王不克犇齊齊桓公使使平之九年齊桓公卒十二年叔帶復歸於周十三年鄭伐滑王使游孫伯服請滑鄭人囚之王怒將以翟伐鄭富辰諫曰凡我周之東徙晉鄭焉依子頹之亂又鄭之由定今以小怨棄之王不聽十五年王降翟

師以伐鄭王德翟人將以其女為后富辰諫曰平桓莊  
惠皆受鄭勞王棄親親翟不可王不聽十六年王絀翟  
后翟人來誅殺譚伯富辰以其屬死之初惠后欲立王  
子帶故以黨開翟人翟人遂入周襄王出奔鄭鄭居王  
于汜子帶立為王取襄王所絀翟后與居溫十七年襄  
王告急于晉晉文公納王而誅叔帶襄王乃賜晉文公  
珪鬯弓矢為伯以河內地與晉二十年天王狩于河陽  
諸侯畢朝

晉文公踐  
土之盟

二十四年晉文公卒三十一年秦

穆公卒三十二年襄王崩子頃王壬臣立頃王六年崩  
子匡王班立匡王六年崩弟瑜立是為定王定王元年  
楚莊王伐陸渾之戎次洛使人問九鼎王使王孫滿却  
之十年楚莊王圍鄭鄭伯降己而復之十六年楚莊王  
卒二十一年定王崩子簡王夷立簡王十三年晉殺其  
君厲公十四年簡王崩子靈王泄心立靈王二十四年  
齊崔杼弑其君莊公二十七年靈王崩子景王貴立景  
王十八年后太子聖而早卒二十年景王愛子朝欲立

之會崩子丐之黨爭立國人立長子猛是為悼王王子朝攻殺猛晉人攻子朝而立丐是為敬王敬王元年晉人入之王子朝自立敬王不得入居澤四年晉率諸侯入敬王于周子朝為臣諸侯城周十六年子朝之徒復作亂敬王奔于晉十七年晉定公遂入敬王于周齊田恒弑其君簡公二十年孔子相魯四十一年楚滅陳孔子卒四十二年敬王崩子元王仁立元王八年崩子定王介立定王十六年三晉滅智伯分有其地二十八年

定王崩長子去疾立是為哀王哀王立三月弟叔襲殺  
哀王而自立是為思王思王立五月少弟嵬攻殺思王  
而自立是為考王此三王皆定王之子考王十五年崩  
子威烈王午立初考王封其弟於河南是為桓公以續  
周公之官職桓公卒子威公代立威公卒子惠公代立  
乃封其少子於鞏以奉王號東周惠公威烈王二十三  
年九鼎震是歲韓趙魏為諸侯二十四年崩子安王驕  
立是歲盜殺楚聲王安王立二十六年崩子烈王喜立

是歲周太史儋見秦獻公曰始周與秦國合而別別五  
百載復合合十七歲而霸王者出焉十年烈王崩弟扁  
立是為顯王顯王五年秦獻公稱霸王致賀九年致文  
武胙於秦孝公二十五年秦會諸侯於周二十六年周  
致伯於秦孝公四十四年秦惠王稱王其後諸侯皆稱  
王四十八年顯王崩子赧王延立赧王時東西周分治  
赧王徙都西周西周武公立公子咎為太子其太子死  
有五庶子母適立司馬翦說楚立之八年秦攻宜陽楚

救之將伐周蘇代為周說楚王曰何以周為秦之禍也  
言周之為秦甚於楚者欲令周入秦也故謂周秦也周  
知其不可解必入於秦此為秦取周之精者也為王計  
者周於秦因善之不於秦亦言善之以疏之於秦周絕  
於秦必入於郢矣秦借道兩周之間將以伐韓周畏之  
史厭謂周君曰何不令人謂韓公叔曰秦之敢絕周而  
伐韓者信東周也公何不與周地發質使之楚秦必疑  
楚不信周是韓不伐也又謂秦韓疆與周地將以疑周

於秦也周不敢不受秦必無辭而令周不受是受地於韓而聽於秦秦召西周君西周君惡之周令人謂韓王曰秦召西周君將以使攻王之南陽也王何不出兵於南陽周君將以為辭於秦周君不入秦秦必不敢踰河而攻南陽矣東周與西周戰韓救西周或為東周說韓王曰西周故天子之國多名器重寶王紫兵母出可以德東周而西周之寶可以盡矣楚圍雍氏韓徵甲與粟於東周東周君恐召蘇代而告之代曰君何患於是臣能



使韓毋徵甲與粟於周又能為君得高都周君曰子苟能請以國聽子代見韓相國曰楚圍雍氏期三月也今五月不能拔是楚病也今相國乃徵甲與粟於周是告楚病也韓相國曰善使者已行矣代曰何不與周高都韓相國大怒曰吾毋徵甲與粟於周亦已多矣何故與周高都也代曰與周高都是周折而入於韓也秦聞之必大怒忿周即不通周使是以弊高都得完周也曷為不與相國曰善果與周高都三十四年蘇厲說秦白起

無攻梁四十二年秦破華陽梁城周從馬犯說也四十五年周君之秦秦攻周周最謂秦王曰為王計者不攻周攻周實不足以利聲畏天下則秦不王矣五十八年三晉距秦周令相國之秦還而見秦王曰請為王聽東方之變秦攻三晉五十九年秦取韓陽城負黍西周與諸侯約從將天下銳師出伊闕攻秦秦昭王怒使將軍繆攻西周西周君犇秦獻其邑三十六口三萬周民遂東亡秦取九鼎寶器而遷西周公於囂狐後七歲秦莊

襄王滅東西周周亡

論曰周道備矣蓋文武周公之盛也至於東遷王綱陵  
遲蓋幽厲之所為衰也太史公追論營洛其意蓋曰周  
之興也以豐鎬亡也以洛邑其實不然孔子曰文武之  
政布在方策予因舊文畧討論之使學者可覽見焉

全五十七卷

卷五十七

儼山集卷五十七

欽定四庫全書

儼山集卷五十八

明 陸深 撰

史記二

吳記

吳太伯弟仲雍皆周太王之子而王季之兄也王季賢  
而有聖子昌太王欲立王季以及昌於是太伯仲雍乃  
避之荆蠻文身斷髮示不可用季立是為王季而昌為

文王太伯之荆蠻自號句吳荆蠻義之從而歸之千餘家立為吳太伯太伯卒無子仲雍立是為吳仲雍仲雍卒子季簡立季簡卒子叔達立叔達卒子周章立是時周武王克殷求太伯仲雍之後得周章周章已君吳矣因而封之乃封周章弟虞仲於周之北故夏虛是為虞仲列為諸侯周章卒子熊遂立熊遂卒子柯相立柯相卒子彊鳩夷立彊鳩夷卒子餘橋疑吾立餘橋疑吾卒子柯盧立柯盧卒子周繇立周繇卒子屈羽立屈羽卒

子夷吾立夷吾卒子禽處立禽處卒子轉立轉卒子頗  
高立頗高卒子句卑立是時晉獻公滅周北虞公以開  
晉伐虢也句卑卒子去齊立去齊卒子壽夢立壽夢立  
而吳益大始稱王自太伯作吳五世而武王克殷封其  
後為二其一虞在中國其一吳在夷蠻十二世而晉滅  
中國之虞中國之虞滅二世而夷蠻之吳興從太伯至  
壽夢凡十九世壽夢二年楚大夫申公巫犇晉自晉  
使吳教吳用兵乘車令其子為吳行人吳於是始通於

中國乃伐楚十六年楚伐吳至衡山二十五年壽夢卒  
壽夢有子四人長曰諸樊次曰餘祭次曰餘昧次曰季  
札季札賢而壽夢欲立之季札讓乃立諸樊稱攝元年  
諸樊已除喪讓位季札季札謝曰願附子臧之義吳人  
乃舍之秋吳伐楚楚敗我師十三年諸樊卒有命授弟  
餘祭以次必致國於札札封於延陵號曰延陵季子餘  
祭三年齊相慶封有罪來犇子之朱方之縣以為奉邑  
以女妻之富於在齊四年吳使季札聘於魯去魯遂使



齊去齊使於鄭去鄭適衛去衛適晉十年楚會諸侯伐  
吳之朱方以誅齊慶封吳亦攻楚取三邑而去十一年  
楚伐吳至雩婁十二年楚復來伐次於乾谿楚師敗走  
十七年餘祭卒弟餘昧立四年餘昧卒欲授季札札讓  
逃去餘昧子僚立二年公子光伐楚敗而亡王舟復襲  
得舟而還五年楚臣伍子胥來奔公子光客之公子光  
者諸樊之子也嘗以為吾父兄弟四人當傳至季子季  
子即不受國光父先立即不傳季子光當立陰納賢士

欲以襲僚吳使公子光伐楚敗楚師迎楚故太子建母於居巢以歸因北伐敗陳蔡之師九年公子光伐楚拔居巢鍾離初子胥之犇吳也說以伐楚之利公子光曰胥欲為父兄報仇耳於是子胥知光志乃求勇士專諸見之光喜子胥退耕於野以待十二年冬楚平王卒十三年春吳欲因喪伐之使公子蓋餘燭庸圍楚之六滯使季札於晉以觀諸侯之變楚絕吳後吳不得還於是公子光曰時不可失也告專諸曰不索何獲專諸曰僚可

殺也母老子弱而兩公子將兵攻楚外困而內空也是  
無奈我何四月丙子光伏甲士於窟室而謁僚飲僚陳  
兵於道自宮至光之家門階戶席皆僚之親也人夾持  
鉞公子光佯為足疾入于窟室使專諸置匕首於炙魚  
之中進食而弑僚公子光竟立是為吳王闔廬乃以專  
諸子為卿季子至命哭諸僚墓復位而待公子燭庸蓋  
餘二人遇圍於楚者聞僚弑而光立乃以其兵降楚楚  
封之於舒闔廬元年舉伍子胥為行人而與謀國事楚

臣伯嚭奔吳吳以為大夫闔廬與子胥伯嚭將兵伐楚拔舒殺二公子光謀入郢將軍孫武曰未可四年伐楚取六與濞五年伐越敗之六年楚使子常囊瓦伐吳迎而擊之大敗楚軍於豫章取居巢而還九年西伐楚至於漢水與楚兵夾水而陳闔廬弟夫槩欲戰闔廬弗許夫槩曰王已屬臣兵兵事上利何待焉遂以其部五千人大敗楚兵闔廬縱兵追之比至郢五戰楚五敗楚昭王奔鄖與鄖公犇隨吳遂入郢子胥伯嚭因以報父讎

十年春越聞闔廬之在郢國空乃伐吳吳使別將擊之  
秦兵救楚吳師敗夫槩見秦越交敗吳而闔廬留楚不  
去夫槩亡歸吳自立為王闔廬引歸攻夫槩夫槩奔楚  
楚昭王復入郢而封夫槩於堂谿為堂谿氏十一年吳  
使太子夫差伐楚取番楚徙都十五年孔子相魯十九  
年夏吳伐越句踐為槁李之戰使死士三行造吳師呼自  
剄吳師觀之越因而伐之敗之姑蘇傷闔廬指軍却七  
里闔廬病傷而死太子夫差立志報越每朝出入使人呼其

名曰夫差而忘句踐殺而父乎則對曰不敢三年乃報越夫差元年以大夫伯嚭為太宰習戰射常以報越為志二年夫差率精兵伐越敗之夫椒報姑蘇也越句踐乃以甲兵五千人棲于會稽使大夫種因太宰嚭而行成請委國為臣妾夫差將許之伍子胥諫曰句踐為人能辛苦後必悔之夫差不聽聽太宰嚭卒許越平與盟而去七年吳聞齊景公死而大臣爭寵新君弱乃興師北伐齊子胥諫曰不先越而務齊不亦謬乎吳不聽遂

北伐敗齊師於艾陵至繒召魯哀公而徵百牢季康子使子貢以周禮說太宰嚭乃得止因畱畧地於齊魯之南九年為騶伐魯至與魯盟乃去十年伐齊歸十一年復伐齊句踐率其衆以朝吳厚獻遺之夫差喜惟子胥懼曰是棄吳也諫曰盤庚之誥有顛越勿遺吳不聽使子胥於齊子胥屬其子於齊鮑氏還報吳夫差大怒賜屬鏃之劍以死齊鮑氏弒悼公夫差聞之哭於軍門外三日乃從海上攻齊兵敗乃引歸十三年吳召魯衛之

君會於橐臯十四年春北會諸侯於黃池欲霸中國以  
全周室六月戊子越伐吳乙酉越與吳戰丙戌虜吳太  
子友丁亥入吳吳人告敗於夫差夫差惡其聞也斬七  
人於幕下七月辛丑吳晉爭長夫差曰於周室我為長  
晉定公曰於姬姓我為伯卒長晉盟已與晉別欲伐宋  
太宰嚭曰可勝而不能居也乃引兵歸國士皆罷敝於  
是乃使厚幣以與越平十八年越益彊句踐伐敗吳師  
於笠澤二十年越復伐吳二十一年遂圍吳二十三年



十一月丁卯越破吳欲遷夫差於甬東子百家居之夫  
差曰孤老矣不能事君王也吾悔不用子胥之言自令  
陷此遂自殺吳亡越誅太宰嚭而歸

論曰語有之蓬生麻中子覽延陵季子之高誼喟然歎  
曰何其似太伯也太伯用以造周季札以而基禍豈所  
謂可與立未可與權者耶

儼山集卷五十八

欽定四庫全書

儼山集卷五十九

明 陸深 撰

傳一

季札傳

季札者吳壽夢之子也封於延陵故號曰延陵季子初  
壽夢有子四人長曰諸樊次曰餘祭次曰餘昧次曰季  
札季札賢壽夢欲立之季札讓不可於是立諸樊諸樊

已除喪讓位季札季札曰昔曹宣公之卒也諸侯與曹人不義曹君將立子臧子臧去之以成曹君君子曰能守節矣君義嗣誰敢干君有國非吾節也札雖不才願附於子臧之義吳人固立季札季札棄其室而耕乃舍之諸樊立十三年而卒有命授弟餘祭欲傳以次必致國於季札而止以稱先王壽夢之意且嘉季札之義兄弟皆欲致國令以漸致焉餘祭四年聘於魯見叔孫穆子而說之謂之曰子其不得死乎好善而不能擇人吾

聞君子務在擇人吾子為魯宗卿而任其大政不慎舉  
何以堪之禍必及之請觀周樂為之歌周南召南曰美  
哉始基之矣猶未也然勤而不怨歌邶鄘衛曰美哉淵  
乎憂而不困者也吾聞衛康叔武公之德如是是其衛  
風乎歌王曰美哉思而不懼其周之東乎歌鄭曰其細  
已甚其民不堪也是其先亡乎歌齊曰美哉泱泱乎大  
風也哉表東海者其太公乎國未可量也歌豳曰美哉  
蕩蕩乎樂而不淫其周公之東乎歌秦曰此之謂夏聲

夫能夏則大大之至也其周之舊乎歌魏曰美哉泂泂乎大而婉儉而易行以德輔此則盟主也歌唐曰思深哉其有陶唐氏之遺風乎不然何憂之遠也非令德之後誰能若是歌陳曰國無主其能久乎自鄆以下無譏焉歌小雅曰美哉思而不貳怨而不言其周德之衰乎猶有先王之遺民也歌大雅曰廣哉熙熙乎曲而有直體其文王之德乎歌頌曰至矣哉直而不倨曲而不詘近而不偏遠而不攜遷而不淫復而不厭哀而不愁樂

而不荒用而不匱廣而不宣施而不費取而不貪處而  
不底行而不流五聲和八風平節有度守有序盛德之  
所同也見舞象箭南籥者曰美哉猶有憾見舞大武曰  
美哉周之盛也其若此乎見舞韶濩者曰聖人之弘也  
猶有慙德聖人之難也見舞大夏曰美哉勤而不德非  
禹其誰能及之見舞招劑曰德至矣哉大矣如天之無  
不燾也如地之無不載也雖甚盛德無以加矣若有他  
樂吾不敢觀去魯遂使齊說晏平仲謂之曰子速納邑

與政無邑無政乃免於難齊國之政將有所歸未得所  
歸難未息也故晏子因陳桓子以納政與邑是以免於  
樂高之難去齊使於鄭見子產如舊交與之縞帶子產  
獻紵衣焉謂子產曰鄭之執政侈難將至矣政必及子  
子為政慎以禮不然國將敗去鄭適衛說蘧瑗史狗史  
緇公子荆公叔發公子朝曰衛多君子未有患也自衛  
如晉將宿於戚聞鐘聲曰異哉吾聞之辯而不德必加  
於戮夫子獲罪於君以在此懼猶不足而又可以樂乎



夫子之在此猶燕之巢于幕也君在殯而可以樂乎遂  
去之文子聞之終身不聽琴瑟適晉說趙文子韓宣子  
魏獻子曰晉國其萃於三家乎將去謂叔向曰吾子勉  
之君侈而多良大夫皆富政將在三家吾子直必思自免  
於難季札之初使北過徐君徐君好季札劍口弗敢言  
札心知之為使上國未獻也還至徐徐君已死於是乃  
解其寶劍繫之徐君冢樹而去從者曰徐君已死尚誰  
予乎季子曰不然始吾心已許之豈以死倍吾心哉餘

祭卒傳餘昧及餘昧卒欲授札札讓逃去於是吳人曰  
先王有命兄卒弟代必致季子今季子逃位則餘昧子  
當代乃立餘昧之子僚為王公子光者諸樊之子也常  
以為吾父兄弟四人當傳至季子季子即不受國光父  
先立即不傳季子光當立又用專諸曰我真王嗣當立  
吾欲求之季子雖至不吾廢也既而篡僚季子至曰苟  
先君無廢祀民人無廢主社稷有奉乃吾君也吾敢誰  
怨乎哀死事生以待天命非吾生亂立者從之先人之

道也闔廬命哭僚墓復位而待札長子死於羸博之間  
因葬焉孔子使子貢觀之其穿深不及泉其斂以時服  
既葬封其壙左袒右旋號者三言曰骨肉歸復於土命  
也若魂氣則無不之也遂行孔子曰延陵季子之於禮  
其合矣札凡事吳七主年九十餘卒孔子表其葬曰嗚  
呼有吳延陵季子毘陵之間尚有季札墓云

論曰司馬子長稱季子閱覽博物及觀羸博之役又何  
深於禮也信乎附青雲哉

重修伍子胥傳

伍員字子胥楚人也父奢兄尚其先曰伍舉以直諫事楚莊王故世有顯名於楚楚平王有太子名曰建使伍奢為太傅費無忌為少傅無忌不忠於太子平王使無忌為太子取婦於秦秦女好馳歸報平王曰秦女絕美王可自取而更為太子取婦無忌既以秦女自媚因去太子而事平王恐一旦王卒而太子立乃因讒太子建建母蔡女也無寵於王王稍益疏建使建守城父備邊

兵頃之無忌又日夜言太子短於王曰太子以秦女之  
故不能無怨願王少自備也自太子居城父將兵外交  
諸侯且欲入為亂矣王乃召其太傅奢考問之奢知無  
忌讒因曰王獨奈何以讒賊小臣疏骨肉之親乎無忌  
曰王今不制事成矣王且見禽於是王怒囚伍奢而使  
城父司馬奮揚往殺太子奮揚使人先告太子建亡奔  
宋無忌言於王曰奢有二子皆賢可質其父而召之不  
然且為楚患王使使謂奢曰能致汝二子則生不能則

死奢曰尚為人仁呼必來員為人剛戾忍詢其勢必不來王不聽使人召二子曰來吾生汝父不來今殺奢也尚欲往員曰楚之召我兄弟非欲以生我父也恐有脫者後生患故以父為質二子到則父子俱死矣何益不如奔他國借力以雪父之恥無俱滅為也尚曰我知往終不能全然恨父召以求生而不往後不能雪恥終為天下笑耳謂員可去矣汝能報父之讎我將歸死尚既就執使者捕員貫弓執矢嚮使者使者不敢進員遂

亡往從太子建於宋奢聞員之亡也曰楚國君臣且苦  
兵矣尚至楚楚并殺之員既至宋宋有華氏之亂乃與  
建俱奔鄭鄭人甚善之建又適晉晉頃公曰太子既善  
鄭鄭信太子能為我內應而我攻其外滅鄭必矣滅鄭  
而封太子太子乃還鄭會從者告其謀鄭定公與子產  
誅殺建建有子曰勝員懼乃與勝俱奔吳到昭關昭關欲執  
之員遂與勝獨身步走幾不得脫追者在後至江江上  
有一漁父知員之急乃渡員既渡解劍與漁父曰此劍

直百金父曰楚國之法得伍員者粟五萬石爵執珪豈徒百金劔耶不受員未至吳而疾止中道乞食至吳吳王僚方用公子光為將員乃因公子光以求見吳王久之楚之邊邑鍾離與吳之邊邑卑梁氏俱蠶兩女子爭桑相攻至於兩國舉兵相伐吳使公子光伐楚拔其鍾離居巢而歸員說吳王僚曰楚可破也願復遣公子光光謂王曰彼伍員父兄為戮於楚而勸王伐楚者欲以自報其讎耳楚未可破也員知光有內志而未可說以外事



乃進專諸於公子光退而與太子建之子勝耕於野五  
年而楚平王卒初平王所奪太子建秦女生子軫及平  
王卒軫立是為昭王吳王僚因楚喪使二公子將兵往  
襲楚楚發兵絕吳兵之後不得歸吳國內空公子光乃  
令專諸襲刺王僚而自立為王是為闔廬闔廬既立得  
志乃召員以為行人而與謀國事楚誅其大臣卻宛伯  
州犁伯州犁之孫伯嚭亡奔吳吳亦以為大夫前所遣  
二公子將兵伐楚者道絕後聞僚弑而闔廬立遂以其

兵降楚楚封之於舒闔廬立三年乃興師與伍員伯嚭伐楚拔舒遂禽故吳二將軍因欲至郢將軍孫武曰民勞未可且待之乃歸四年吳伐楚取六與滯五年伐越敗之六年楚昭王使公子囊瓦將兵伐吳吳使員迎擊大破楚軍於豫章取居巢九年闔廬謂伍員孫武曰始子言郢未可入今果何如二子對曰楚將囊瓦貪而唐蔡皆怨之王必欲大伐之先得唐蔡乃可闔廬聽之悉興師與唐蔡伐楚與楚夾漢水而陳吳王之弟夫槩將兵

擊楚將子常子常敗走奔鄭於是吳乘勝而前五戰遂  
至郢己卯楚昭王出奔庚辰吳王入郢昭王出亡入雲  
夢盜擊王王走郢鄖公弟懷曰平王殺我父我殺其子  
不亦可乎鄖公恐與王奔隨吳兵圍隨謂隨人曰周之  
子孫在漢川者楚盡滅之隨人欲殺王王子綦匿王自  
為王以當之隨人卜與王於吳不吉乃謝吳不與王初  
員與申包胥為交員之亡也謂包胥曰我必覆楚包胥  
曰我必存之及吳兵入郢員求昭王既不得乃掘楚平

王墓出其尸鞭之三百然後已申包胥亡於山中使人謂子胥曰子之報讎其已甚矣吾聞之人衆者勝天天定亦能勝人今子故平王之臣親北面而事之今至於僂死人此豈無天道之極乎員曰為我謝包胥曰吾日暮塗遠吾故倒行而逆施之於是申包胥走秦告急求救秦不許包胥立於秦庭晝夜哭七日七夜不絕其聲秦哀公憐之曰楚雖無道有臣若是可無存乎乃遣五百乘救楚六月擊敗吳兵於稷會闔廬久畱楚求昭王

而王弟夫槩乃亡歸自立為王乃釋楚而歸擊夫槩夫  
槩奔楚楚昭王見吳有內亂乃復入郢楚復與吳戰吳  
敗乃歸後二歲闔廬使太子夫差將兵伐楚取番楚懼  
吳復大來乃去郢徙於都當是時吳以伍員孫武之謀  
西破彊楚北威齊晉南服越人其後五年伐越越王句  
踐迎擊敗吳於姑蘓闔廬病創死夫差既立為王以伯  
嚭為太宰習戰射二年後伐越敗越於夫椒越王句踐  
棲於會稽之上使大夫種厚幣遺吳太宰嚭以請和求

委國為臣妾吳王將許之伍員諫曰昔有過氏殺斟灌以伐斟尋滅夏后帝相帝相之妃緡方娠逃於有仍而生少康少康為有仍牧正有過又欲殺少康少康奔有虞有田一成有衆一旅後遂收夏衆撫其官職使人誘之遂滅有過氏復禹之績祀夏配天不失舊物今吳不如有過之彊而句踐大於少康今不因此而滅之又將寬之不亦難乎且句踐為人能辛苦今不滅後必悔之吳王不聽用太宰嚭計卒與越平其後五年乃興師北

伐齊員諫曰句踐食不重味衣不重采弔死問疾且欲  
有所用之此人不死必為吳患今吳之有越猶人之有  
腹心疾也王不先越而乃務齊不亦謬乎吳王不聽伐  
齊大敗齊師於艾陵遂威鄒魯之君以歸益䟽子胥之  
謀其後四年吳王將北伐齊越王句踐用子貢之謀乃  
率其衆以助吳而重寶以獻遺太宰嚭嚭既數受越賂  
其愛信越殊甚日夜為言於吳王王信用嚭之計員諫  
曰夫越腹心之病今信其浮辭詐偽而貪齊破齊譬猶

石田無所用且盤庚之誥曰有顛越不恭剝殄滅之俾  
無遺育無使易種于茲邑此商之所以興願王釋齊而  
先越不然後悔無及吳王不聽使員於齊員臨行謂其  
子曰吾數諫王王不用吾今見吳之亡矣汝與吳俱亡  
無益也乃屬其子於齊鮑牧而還報吳太宰嚭既與子  
胥有隙因讒曰子胥為人剛暴少恩猜賊其怨望恐為  
深禍也前日王欲伐齊子胥以為不可王卒伐之而有  
大功子胥恥其計謀不用乃反怨望而今王又復伐齊




子胥專懷彊諫沮毀用事徒幸吳之敗以自勝其計謀  
耳今王自行悉國中武力以伐齊而子胥諫不用因輒  
謝佯病不行王不可不備此起禍不難且嚭使人微伺  
之其使於齊也乃屬其子於齊之鮑氏夫為人臣內不  
得意外倚諸侯自以為先王之謀臣今不見用常鞅鞅  
怨望願王早圖之吳王曰微子之言吾亦疑之乃使使  
賜員屬鏤之劍曰子以此死員仰天歎曰嗟乎讒臣嚭  
為亂矣王乃反誅我我令若父霸自若未立時諸公子

爭立我以死爭之於先王幾不得立若既得立欲分吳國予我我顧不敢望也然今若聽諛臣言欲殺長者乃告其舍人曰必樹吾墓上以梓令可以為器而抉吾眼縣吳東門之上以觀越之滅吳也乃自剄死吳王聞之大怒乃取員尸盛以鳩夷革浮之江中吳人憐之為立祠於江上因命曰胥山

論曰事豈不有天道者哉伍子胥本用吳以報楚乃謀越以忠於吳初言既酌交疏隕命倒行而逆施亦夫子

果於自與也尚之死足以稱仁子胥終有功名可以不  
死予往來江上未嘗不悲之



儼山集卷五十九